



FINANZEN

"D'AiIB ass keng chinesesch Bank"

05. Jul 2019 - 14:30

D'Asian Infrastructure Investment Bank, kuerz AiIB, gouf virun dräi an engem hallwe Joer an d'Liewe geruff, dat mat Haaptsätz zu Peking. Virun allem China wollt eng Alternativ zu der Weltbank hunn. An enger Woch huet déi asiatesch Investitiounsbank hiert véiert Jorestreffen, an dat zu Lëtzebuerg. Et ass déi éischte Kéier, datt esou e Jorestreffen ausserhalb vun Asie stattfënnt. Déi asiatesch Investitiounsbank ass awer net onëmstridden. De Stephan Polet huet eng Woch virum Jorestrefe vun der AiIB mam Vize-President vun der Bank, dem Brit Sir Danny Alexander geschwat.

Stephan Polet / cz



De Sir Danny Alexander zesumme mam Lëtzebuerger Finanzminister Pierre Gramegna

Vill europäesch Länner wiere Grënnungsmember a Kapitalgeber vun der Asiatescher Infrastruktur Investitiounsbank, seet de Vize-President vun der AiIB, Danny Alexander. Et wier dohier wichteg an normal, datt een och an Europa géif e Jorestreffen ofhalen.

Lëtzebuerger wier dat éischt Land gewiecht, dat säin Interêt ugemellt hat, fir Member vun der Bank ze ginn, sou den Danny Alexander. Dofir wier ee frou gewiescht, wéi Lëtzebuerg proposéiert hätt d'Jorestreffen 2019 ze organiséieren.

De fréiere britesche Finanzstaatssekretär hätt deemools mat dofir plädéiert, datt Groussbritannien Member vun där Organisatioun gëtt, där hire Vize-President hien haut ass.

D'Iddi vun der AiIB ass et, Infrastrukturprojeten an Entwécklungslänner ze ënnerstëtzen. De Fokus läit dobäi op Asien. De Kampf géint de Klimawandel wier en anere wichtege Kritär, seet den Danny Alexander. An Ägypte wier zum Beispill d'Solarenergie ënnerstëtzt ginn, an Nepal, a Pakistan an Tachikistan wiere Waasserkraaftprojete finanzéiert ginn. D'Stroumnetz an Indien a Banghgladesch gouf erneiert, wat zu méi Effizienz féiert. Och Gazanlage sinn ënnerstëtzt ginn, wat eng wichteg Transitiv-Energieform wier, sou den Danny Alexander.

"Och europäesch Länner hunn Afloss an der Bank"

D'USA a Japan sinn net Member vun der asiatescher Investitiounsbank. En heefege Kritikpunkt ass, datt d'AiIB vu China dominéiert gëtt. Effektiv huet China iwver ee Véierel vun de Stëmmrechter. D'AiIB wier trotzdem keng chinesischesch Bank, betount de Vize-President Danny Alexander.

Et géife Reegele ginn, déi sécherstellen, datt kee Land eleng d'Organisatioun lenke kann, seet den Danny Alexander. Wann een déi europäesch Länner, déi Member sinn, géif froen, géife se soen, datt si en däitlechen Afloss op d'Governance vun der Bank hunn.

"D'Bank ass gréisstendeels onofhängeg vu China"

Fir de Ruff lass ze ginn, datt d'AiIB eng chinesischesch-dominéiert Bank wier, war et wuel net hëllefträich, datt de President vun der asiatescher Investitiounsbank Liqun Jin an engem Interview sot, datt d'AiIB an déi chinesischesch One Belt, one Road-Initiativ zwou Turbinne vun deem selwechte Fliger wieren. Dës Initiativ wëllt iwver Infrastrukturprojeten de weltwäiten Handel facilitéieren. China gëtt dacks virgeworf, iwver Kreditter u Länner, déi hei matmaachen, hiren Afloss ze verstärken. Bei der AiIB géif een awer ëmmer no den eegene Krittären entscheeden, wéi eng Projeten een ënnerstëtzt, seet hire Vize-President.

D'Gemeinsamkeet läit doran, datt si Allenzwee d'Wichtigkeet vu Connectivitéit an Infrastruktur erkennen, fir Handel, Wuesstem an ekonomesch Entwécklung ze ënnerstëtzen, seet den Danny Alexander.

Net gläichgültig géintiwver Reklamatiounen

Déi däitsch Heinrich-Böll-Stiftung huet d'AiIB an engem rezente Rapport och kritiséiert, well si keng gutt Méiglechkeet géif bidde fir Leit, déi vu Projeten negativ betraff ginn, kënne Recours aleeën.

"Déi Kritik ass onsënneg", fënnt den Danny Alexander. D'Bank hätt en extrae Mechanismus, deen et Leit erlaabt sech ze bekloen, wa si fannen, datt Infastrukturprojeten net den AiIB-Krittären entsprechen oder d'Bank e Feeler gemaach huet.

An der Mediathéik:

[Aktuelles](#) / 05. Jul 2019 - 06:20 / Stephan Polet

Lauschteren 

